

Huldigingswoord:

Buy, Floor, Van der Walt

Dit is onmoontlik om 'n omvattende weergawe van die drie kollegas se hydraes op die verskillende terreine te gee. Daarom word by elkeen net sekere kenmerkende aspekte uitgelig.

Wie meer oor hulle lewe en publikasies wil weet, kan daarvan lees in die onderskeie huldigingsbundels wat so pas aan hulle opgedra is. Die titels en redakteurs is onderskeidelik die volgende:

Waar die paaie saamwoon, opgedra aan prof PW Buys – PJ de Bruyn (samesteller);

Koninkryk, Gees en Woord, huldigingsbundel aangebied aan prof dr Lambertus Floor – JC Coetzee (redakteur);

God bou op deur sy Woord, huldigingsbundel van kollegas en oudstudente aan prof Jan J van der Walt – CJH Venter (redakteur).

Dit gaan hier oor drie kollegas met uiteenlopende afkoms, herkoms en agtergrond. Elkeen het sy bepaalde stempel op kerk, teologie en samelewing afgedruk. Tog het hulle sekere basiese dinge in gemeen. Eerstens buig hulle kinderlik voor die Woord, die Bybel. Tweedens gaan hulle uit van die nietigheid en diepe sondigheid van die mens. Derdens bely hulle die verlossing uit genade en word hulle lewe gekenmerk deur blydskap, dankbaarheid en daadkrag. Vierdens was hulle gerespekteerde en gewaardeerde leraars en herders. Hulle arbeid en lewens en dié van hulle onderskeie eggenotes: Lulu (Minnaar), Gep (van de Hel) en Ria (Pelser), was diensbaar aan God en was vir hulle medemens 'n verryking.

PIETER WILLEM BUYS is te Germiston gebore waar hy sy laerskooljare deurloop. Sy hoerskooljare bring hy in Bronkhorstspruit deur en hy studeer daarna aan die destydse PUK vir CHO. Een van sy hoofvakke vir die BA-graad was Afrikaans-Nederlands, onder die bekende professor Gerrit Dekker. Dit het hom help vorm as woordkunstenaar. Ná sy teologiese studie aan die Potchefstroomse Teologiese Skool en die PUK word hy in 1948 predikant van die Gereformeerde Kerk Theunissen en hy bedien die gemeente Kroonstad vanaf 1951 tot 1953. Daarna is hy predikant van die Gereformeerde Kerk Potchefstroom tot 1966, en van die Gereformeerde Kerk Noordbrug tot 1973. Dan word hy professor aan die Potchefstroomse Teologiese Skool en die PU vir CHO, met hoofdoseeropdrag Etiek en Apologetiek. In 1952 behaal hy die Th.M-graad. Sy skripsie handel oor "Die teologiese fundering van die owerheid". In 1970 volg die doktorsgraad met 'n proefskrif getitel: "Die ekklesiologiese onderskeiding van instituut en organisme."

Pieter Buys, of PW – soos hy algemeen onder sy kollegas bekend is – is 'n stil maar deeglike werker. Sy werk is gekenmerk deur presiesheid en korrektheid, deur indringendheid en eenvoud, en sy optrede deur

persoonlike inskiklikheid gepaard met standvastigheid. Hierdie kwaliteite onder andere, het daartoe meegewerk dat hy uitgenooi is om as gasdosent op te tree by die Seminary of the Kosin Presbyterian Church in Pusan, Suid-Korea. Sy besoek het daartoe gelei dat verskeie studente uit Korea hulle nagraadse studie aan die PU kom doen het. Vanaf 1983 dien hy as rektor van die Potchefstroomse Teologiese Skool, 'n pos wat hy vir die gewone driejaartermyn beklee het (1983 - 1985).

Met groot toewyding het hy hom aan kerklike werk gegee, onder andere deputatewerk. Hy was veral betrokke by die redaksie van *Die Kerkblad*. Ook is hy vir die afgelope 22 jaar redakteur van *Slingervel*, 'n blad vir kinders.

Verder het PW hom veral onderskei as iemand wat sy gedagtes taalkundig op keurige manier kan inklee: in formele lesings, praatjies, gesprekke en in preke. Sy teologiese kennis, geïntegreer in sy hele lewensbenadering, vind nie alleen neerslag in wetenskaplike sowel as populêre publikasies in boekvorm of as artikels in tydskrifte nie, maar ook in sy digkuns. Hy het twee digbundels die lig laat sien: *Pleroma* (1977) en *Wit Korbeel* (1987), waarin hy 'n eie en erkende bydrae lewer tot die Afrikaanse letterkunde. TT Cloete se byvoorbeeld in sy artikel in die huldigingsbundel die volgende: "Buys se werk is ryk aan taal. Hy benut woorde uit ons woordeskat wat grootliks onbenut in woordeboeke lê. Hierdie gedigte, wat so vol is van metafisika, die goddelike, die hemelse, van dit wat veraf is, is tegelyk baie naby aan die aarde, en vol van die aarde en die alledaagse".

PW Buys sal onthou word as dienaar van die woord en tegelykertyd bedienaar van die Woord.

LAMBERTUS FLOOR is in Emmen, Nederland gebore en het sy teologiese studie in 1950 aan die Theologische Hogeschool van die Christelike Gereformeerde Kerk in Apeldoorn voltooi. Hy dien agtereenvolgens as predikant in Opperdoes en Almelo. In 1961 kom hy as sendeling na Siloam waar die Christelike Gereformeerde Kerk en die Gereformeerde Kerke in Suid-Afrika saam sendingwerk doen. Hy gooi hom met hart en siel in die arbeid in en wy hom tegelykertyd aan die teologiese studie. In 1965 word hy beroep tot professor in Nuwe Testament en Grieks aan die Hammanskraalse Teologiese Skool van die Gereformeerde Kerke in Suid-Afrika. Vanaf 1978 dien hy as professor in Nuwe Testament aan die Potchefstroomse Teologiese Skool en die PU vir CHO. In 1969 promoveer hy aan die PU vir CHO. Sy proefskrif handel oor "De nieuwe exodus, representatie en incorporatie in het Nieuwe Testament".

Bert Floor was teologies baie aktief. Afgesien van sy betrokkenheid by die Nuwe-Testamentiese Werkgemeenskappe van Potchefstroom en Suid-Afrika was hy betrokke by teologiese tydskrifte. Hy was betrek by *Theologia Reformata* in Nederland en was verskeie jare hulpredakteur van *In die Skriflig*. Sowat dertig publikasies (boeke in kleiner of groter formaat en artikels in boeke) het uit sy pen verskyn, benewens 'n tiental wetenskaplike tydskrifartikels in *Neo Testamentica*, *Koers* en *Theologia Reformata*, en ongeveer dieselfde hoeveelheid in *In die Skriflig*. Daar-

benewens het daar 'n magdom artikels van hom in *Die Kerkblad* en ander kerklike geskrifte verskyn. Hy skryf prinsipieel, eenvoudig en aktueel en word wyd gewaardeer. Dit blyk uit uitnodigings om as gasdosen op te tree aan die Theologiese Hogeschool in Apeldoorn, Nederland, die Theologiese Hogeschool te Amersfoort, Nederland, aan die Seminary of the Kosin Presbyterian Church in Pusan, Suid-Korea, en aan die Evangeliese Theologiese Faculteit, Universiteit van Leuven, België. Ook het hy op uitnodiging besoek gebring aan teologiese opleidingsinrigtings in Brasilië.

Die titel van die huldigingsbundel wat aan hom opgedra is, verteenwoordig, soos die redakteur tereg sê, drie sentrale motiewe wat deurlopend aanwesig is in Floor se teologiese denke en publikasies. Daarmee word hy gehuldig vir sy grondige bydrae tot drie basiese teologiese motiewe: Koninkryk, Gees en Woord. Dit gaan vir hom om God se heerskappy, nie slegs sy heerskappy óór ons nie, maar ook in ons, nie deur 'n onmiddellike werking van die Gees nie, maar deur die Gees wat verbind is met die Woord. So het sy beoefening van teologie 'n sterk persoonlike gerigtheid, 'n sterk Skrifverankertheid en 'n teosentriese diensbaarheid.

JAN JACOBUS VAN DER WALT is op Steynsburg gebore. Hy ontvang sy laerskoolopleiding in Migdol en sy hoërskoolopleiding op Potchefstroom waar hy in 1941 matriculeer. In 1945 behaal hy die BA-graad aan die destydse PUK vir CHO. In 1946 skryf hy in vir die teologiese studie aan die PUK asook vir die Kandidaats aan die Potchefstroomse Teologiese Skool van die Gereformeerde Kerke in Suid-Afrika. In 1948 behaal hy die graad BD en in 1949 voltooi hy die Kandidaatseksamen. Daarna dien hy agtereenvolgens as predikant in die Gereformeerde Kerke Petrusburg, Welkom, Windhoek, Bloemfontein-Wes, Kimberley en Burgersdorp.

Reeds op skool en daarna op Universiteit vertoon hy sterk leierseenskappe: hy word hoofseun van Gimnasium, studenteraadsvoorsitter van die PUK en president van die Afrikaanse Studentebond. Sy blywende belangstelling in jongmense kom tot uiting in sy aktiewe deelname aan Jongeliedeverenigings, onder andere as bondsvoorsitter van die Vrystaat en Natal. Hy is dikwels gekies as ondervoorsitter of voorsitter van Partikuliere sinodes en het ook as sodanig gedien by die Nasionale Sinode en die Algemene Sinode. Hy het as deputaat in 'n verskeidenheid deputategroepe gedien waar hy sterk bydraes gelewer het en was deputaat van die Nasionale Sinode na die Gereformeerde Ekumeniese Sinode in Kaapstad in 1976.

Jan van der Walt het student gebly. In 1974 promoveer hy in die Kerkreg met 'n proefskrif getitel: "Christus as Hoof van die kerk en die presbiteriale kerkregering". Die hoofskap van Christus met daarteenoor die dienende plek van die gelowiges, ook dié wat leiding in die gemeente moet gee, is altyd sterk beklemtoon in sy benadering van die kerk en teologie. Tegelykertyd sien hy Christus binne Trinitariese perspektief en wys daarmee 'n Christosentrisme in die kerk, die prediking en die teologie af.

Hy het hom verder onderskei as iemand met 'n sterk aanvoeling vir prosedure in vergaderings en in die hantering van sake in die algemeen. Gepaard hiermee het hy die gawe om standpunte en besluite korrek, kernagtig, afgebakend en sinvol te formuleer. Weens sy aanleg en toerusting het hy ook as dekaan van die Fakulteit Teologie aan die PU vir CHO gedien: Ongelukkig moes hy weens swak gesondheid op daardie stadium, spoedig vra om ontheffing van die taak.

Met onvermoeide ywer en groot dryfkrag het hy hom gewy aan die uitbouing van Diakoniologie, waarin eenjarige vakke tot volwaardige meerjarige vakke uitgebou moes word. Daarin het hy onder andere verskeie seminare gereël en publikasies die lig laat sien. Afgesien van 'n hele aantal ander publikasies, waaronder boeke vir katkisasie en artikels in kerklike en ander tydskrifte, het sy wetenskaplike publiseerarbeid veral die afgelope paar jaar sterk momentum gekry. En daar is nog 'n paar publikasies onder sy leiding aan die kom.

Sy bydrae op 'n verskeidenheid vlakke het die kerk, die teologie en die samelewing as geheel verryk.

JL Helberg.